

Masa rabia y agita a marcha contra Gobierno di AVP/OLA ayera

ORANJESTAD(AAN): -- E manifestacion di ayera contra gobierno AVP/OLA a bay den un ambiente bastante agita y tabata tin un cantidad grandi di Polis riba pia pa acompaña e masa di hende. Por a ripara di ora cu e grupo di entre 1200 pa 2000 manifestante tabata bin riba L.G. Smith Boulevard, cu e demostracion di e biaha aki lo ta completamente diferente cu esun di 12 di November ultimo.

E manifestantenan tabata cana hopi duro, nan voznan

tabata sona rabia y agresivo y tabata obvio cu nan no tabata den mucho bon beis. Prome cu e masa di hende a yega Bestuurskantor, tabata tin un biento fresco ta supla riba e parkinglot pero di momento cu nan a cuminsa yena dilanti e lugar, un calor insoportable a baha.

Lo ta esaki ta loke lider di MEP Nelson Oduber kier meen cu e rosea cayente di Pueblo?

E manifestacion a wordo guia pa Edwin Jacobs mientras cu Junior Arends tabata

percura pa inspira e hendenan for di riba e Trailer di Libertad.

Nel Oduber y tambe Nilo Swaen, Freddy Refunjol, Ella Yarzagaray, Rudy Croes, Marisol Tromp y otro lidernan di e partido tabata entre e manifestantenan, caminda e "low profile" cu particularmente señor Oduber a mantene tabata remarcable.

E manifestantenan tabata canta "Baha, baha" mescos cu biaha pasa --numa cu mas insistencia-- y tabata carga e mes borchinan cu nan tabata tin cu nan riba 12 di November.

Na varios momento tabata como si fuera e situacion tabata a punto di bay for di man, tambe pasobra Nel Oduber tabata papia un lenguahe cu tabata parce di ta dirigi riba instiga e masa.

Tanto señor Oduber como lider di PPA Benny Nisbet a menciona e baricadanan por ehempel, cu "gobierno lo a pone pa provoca y pa motibo cu e tin miedo di Pueblo".

Premier Henny Eman hunto cu ministranan Tico Croes y

Juni Croes a baha un rato prome cu 6'or y a tuma e manifesto for di den man di secretario di HOT (e organizacion di hobennan di MEP) Maureen Kelly.

Juffrou Kelly a lesa e resolucion pa premier Eman.

Como cu e manifestantenan tabata kier un contesta mes ora, nan no a bira bay back Plaza Betico Croes manera nan a haci biaha pasa pero a keda para warda.

A forma un delegacion di siete pa subi pa oficina di premier Eman pa reuni y djey bolbe cu un contesta pa e manifestantenan.

Sinembargo, caracteristico pa gobierno AVP/OLA, e gobernantenan a nenga pa ricibi e delegacion aki y tabata kier a pospone e reunion pa Dialuna 12'or di merdia prome y djey pa awe-merdia.

Señor Jacobs tabata bula bay bin manera un krik di señor Oduber pa oficialnan di Polis pa coordinador di gobierno, den su afan pa regla cu e delegacion tabata por a subi.

E situacion a stanca com-

pletamente y te ainda e hendenan lo ta para ey si Polis no a dicidi pa kita e baricadanan y pa habri e caminda pa trafico pa 6:40'or di anochi.

E masa enorme di hende a bin dilanti e ora y a grupia bao di afdak di Bestuurskantor na unda polisnan a haya nan obliga pa pusha nan pa stroba nan pa pega mas contra e porta.

Den e bululu cu tabata tin bao di e entrada, un polis a haya sla banda di su wowo.

Cos a bruhá un rato y tabata tin pushamento y trekmento mientras cu mas despues tabata tin tiramento cu boter di cervex y cu palo di bandera.

Tambe a tira cu milkshake, cups cu ijs y cups cu cervex mientras cu diripiente un cuchui a bin cay entre unda polisnan y prensa tabata para.

Finalmente gobierno a ricibi e delegacion di e manifestantenan, cu a baha despues di un ora cu bon noticia o segun señor Oduber, cu un mocion di desconfianza contra su mes pero di esaki mas den otro articulo di DIARIO.



Benny Nisbet PUEBLO A BIN PONE FIN NA CORUPCION

ORANJESTAD(AAN) Li-
der di PPA, Sr. Bennie Nisbet ayera tardi a duna di conoce cu pueblo a pone gobernantenan cu ta den e edificio aki (Bestuurskantor) cu ta edificio di pueblo y "awe cu pueblo a bin manifesta e ta bin haya su mes cu baricada. E pueblo a bin protesta y haya baricada pa strobe pueblo di drenta su cas. Mester comprende cu no tin baricada pa stroba pueblo cu kier drenta su cas.

"Awe pueblo a bin pa pone final na corrupcion, un final na bagamunderia, final na ladronia di dia cla.

"Awe pueblo ta pone final den bon of den malo pasobra esaki ta loke pueblo no ta acepta mas. Pueblo no ta acepta cu gobierno no kier scucha pueblo. Ora gobierno no kier scucha pueblo, pueblo mester para y duna su mensahe bon cla", el a laga sa.

NOS A BIN PA KEDA!!

